

M142: Memento Mori

1,1 nû denkent wîp unde man
1,2 war ir sulent werden
1,3 ir minnent dise broedemî .
1,4 unde wænent iemer hier sîn .
1,5 si ne dunket iu nie . sô minnesam .
1,6 eine kurze wîle sulent ir si hân
1,7 ir ne lebent nie sô gerne manigiu zît
1,8 ir müezent verwandelen disen lîp .

2,1 dâ hine ist ein michel menigî .
2,2 sie wânten iemer hier sîn .
2,3 sie minneten dise wênicheit .
2,4 iz ist in hiute vile leit .
2,5 si ne dûhte sie . nie sô minnesam .
2,6 si habent si iedoch verlâzen
2,7 ich ne weiz war sie sint gevarn .
2,8 got müeze sô alle bewarn .

3,1 sie hügeten hier ze lebenne .
3,2 sie gedâhten hin ze varnne .
3,3 ze der êwigen mendî
3,4 dâ sie iemer soleten sîn .
3,5 wie lützel sie des gedâhten
3,6 war sie ze jungeste varn solten
3,7 nû habent siu iz bevunden .
3,8 sie wæren gerne erwunden .

4,1 paradisus daz ist verre hinnen
4,2 dar kam vile selten dechein man .
4,3 daz er her widerwûnde
4,4 unde er uns daz mære brünge .
4,5 alde er iu daz gesagete
4,6 weliches lîbes siu dort lebeten .
4,7 sulent ir iemer dâ genesen
4,8 ir müezent iu selbe die boten wesen .

5,1 disiu werlt ist alsô getân
5,2 swer zuo ir beginnet vâhen .

- 5,3 si machet iz ime alse wunderliep
5,4 von ir komen ne mac er niet .
5,5 sô begrîfet er ire genüege
5,6 er habete ir gerne mêrre .
5,7 daz tuot er unz an sîn ende .
5,8 sô ne habet er hier noch denne .
- 6,1 ir wænent iemer hier leben .
6,2 ir müezet es ze jungeste rede ergeben .
6,3 ir sulent al ersterben .
6,4 ir ne mügent es niewet über werden .
6,5 der man einer stuntwîle zergât .
6,6 alsô schiere . sô diu brâwe zesamene geslæt .
6,7 des wile ich mich vermezzen .
6,8 sô wirdet sîn schiere vergezzen .
- 7,1 got geschuof iuch alle .
7,2 ir koment von eineme manne .
7,3 dô gebôt er iu ze deme lebenne .
7,4 mit minnen hier ze wesenne .
7,5 daz ir wærent als ein man .
7,6 daz hânt ir übergangen .
7,7 habetent ir anders niewet getân .
7,8 ir muosent es iemer schaden hân .
- 8,1 doch ir koment alle von eineme manne .
8,2 ir bint iedoch gescheiden
8,3 mit manicvalten listen .
8,4 mit michelen unküsten .
8,5 der eine ist wîse unde vruot .
- 9,1 des wirdet er verdamnet .
9,2 des rehten bedarf der arme man .
9,3 des mac er leider niewet hân .
9,4 er ne koufe iz alsô tiure .
9,5 des varn sie al ze helle .
- 10,1 gedæhten siu denne .
10,2 wie iz vert an dem ende .
10,3 sô vert er hine durh nôt .
10,4 sô ist er iemer vürder tât .
10,5 wande er daz reht verkoufete
10,6 sô vert er in die helle .
10,7 dâ muoz er iemer inne wesen .
10,8 got selben hât er hin gegeben .
- 11,1 obe ir alle eines rehten lebetent .
11,2 sô wurdent ir alle geladet in .

- 11,3 ze der êwigen mendîn .
11,4 dâ ir iemer soletent sîn .
11,5 daz eine hânt ir iu selben .
11,6 von diu sô ne mügent ir gên dâr in .
11,7 daz ander gebent ir den armen .
11,8 ir müezent iemer dâr vore stên .
- 12,1 gesach in got . daz er ie wart
12,2 der dâ gedenket an die langen vart .
12,3 der sich dar gewarnet .
12,4 sô got selbe gebôt .
12,5 daz er gar wære
12,6 swâ er sînen boten sæhe .
12,7 daz sage ich in triuwen
12,8 er kumet ie nochwanne .
- 13,1 nehein man der ne ist sô wîse .
13,2 der sîne vart wizze .
13,3 der tât der bezeichnenet den diep .
13,4 iuwer ne lât er hier niet .
13,5 er ist ein ebenære .
13,6 nehein man ist sô hêre
13,7 er ne müeze ersterben .
13,8 des ne mac ime der schatz ze guote werden .
- 14,1 habet er sînen rîchtuom sô geleit
14,2 daz er veret âne arbeit .
14,3 ze den schoenen herbergen
14,4 vindet er den süezen lôn .
14,5 des er in dirre werlte niewet gelebete .
14,6 sô lützel riuwet iz in dâ .
14,7 in dunket dâ bezzer ein tac .
14,8 denne hier tûsent daz ist wâr .
- 15,1 swes er hier verleibet
15,2 daz wirdet ime übele geteilet .
15,3 habet er iet hine gegeben
15,4 des muoz er iemer vürder leben
15,5 er tuo iz unz er wole mac
15,6 hier noch kumet der tac .
15,7 habet er es denne niwet getân .
15,8 sô ne mac er iz nie gebüezen .
- 16,1 der man der ist niwet wîse .
16,2 der ist an einer verte .
16,3 einen boum vindet er schoenen .
16,4 dâr under gât er ruowen
16,5 sô drücket in der slâf dâ .

16,6 sô vergizzet er dar er scholte .
16,7 als er denne ûf springet
16,8 wie sêr iz in denne riuwet .

17,1 ir bezeichnenet alle den man .
17,2 ir müezent durh nôt hinnen .
17,3 der boum bezeichnenet dise werlt .
17,4 ir bint eteswaz hier vertwelet .
17,5 ir hügetent hier ze lebenne .
17,6 ir ne dâhtent hin ze varnne .
17,7 diu vart diu dunket iuch sorcsam .
17,8 ir koment dannen obenân .
17,9 dar müezent ir bewinden .
17,10 daz sulent ir wole bevinden
17,11 ir îlent alle wole getuon .
17,12 ir ne durfent sorgen umbe den lôn .
17,13 sô wole ime der dâ wole getuot .
17,14 es wirdet ime wole gelônnet .

18,1 jâ dû vile übeler mundus
18,2 wie betriugest dû uns sus .
18,3 dû habest uns gerichen .
18,4 des sîn wir alle beswichen
18,5 wir ne verlâzen dich ne etelîchiu zît
18,6 wir verliesen sêle unde lîp .
18,7 alsô lange sô wir hier leben .
18,8 got habet uns selpwale gegeben .

19,1 truhtîn künic hêre .
19,2 nobis miserere .
19,3 dû müezest uns geben den sin .
19,4 die kurzen wîle sô wir hier sîn .
19,5 daz wir die sêle bewaren .
19,6 wande wir durh nôt hinnen sulen varn .
19,7 vrô sô müezent ir wesen iemêr .
19,8 daz machet alein Nôtkêr